

MINNISPUNKTAR TIL ÍSLANDSDEILDAR*af norrænum samráðsfundi landsdeilda IPU í Reykjavík 20. september 2012*

Af hálfu Íslandsdeildar Alþjóðþingmannasambandsins (IPU) sóttu fundinn Þuríður Backman formaður auk Örnur Gerðar Bang, ritara Íslandsdeildar. Fundurinn var haldinn til undirbúnings þátttöku í 127. þingi IPU í Québec 21.-26. október nk. Hér á eftir fer stutt yfirlit yfir helstu málefni sem voru til umræðu á fundinum.

Þuríður Backman, formaður Íslandsdeildar, stýrði fundinum og bauð fundargesti velkomna til Reykjavíkur. Fyrsta mál á dagskrá var umræða um niðurstöður vorþings IPU sem haldið var í Kampala 31. mars -5. apríl sl. Þá kynnti Krister Örnfjäder, norrænn fulltrúi í framkvæmdastjórn IPU, áhersluatriði framkvæmdastjórnarinnar og hvað helst var til umræðu á stjórnarnefndarfundi tólflús-hópsins í París 28.-30. september sl. og fundi undirnefndar um fjármál IPU. Hann sagði fjármál IPU hafa verið aðalumræðuefni fundarins í París og fjárhagsáætlun fyrir árið 2013. Tekist hafi að leggja fram áætlun sem minnkar kostnað enn frekar fyrir árið 2013. Þá var haldinn sérstakur fundur undirnefndar um fjármál þann 28. ágúst til að ræða fjárhagsáætlun IPU fyrir árið 2013. Auk þess hittist nefndin á fundi í Genf 14.-15. maí sl. og hefur haldið þrjá símafundi á árinu. Örnfjäder gegnir formennsku í undirnefndinni og sagði hann að skoðaðir hafi verið ýmsir möguleikar til að minnka kostnað við rekstur sambandsins og þeir hafi verið settir fram í skýrslu sem kynnt var á stjórnarnefndarfundi Tólflús-hópsins við góðar undirtektir.

Örnfjäder lagði í máli sínu áherslu á mikilvægi þess að auka frjáls fjárframlög til sambandsins en þau hafa ekki skilað sér í þeim mæli sem vonast var eftir. Þuríður spurði Örnfjäder hvort frjálsu framlögin væru eyrnamerkt sérstökum verkefnum hjá IPU eða hvort sambandið hefði frjálsar hendur um það hvernig þeim væri varið. Örnfjäder svaraði því til að hægt væri að skilgreina í hvaða málaflokk fjárframlagið yrði notað væri þess óskað. Hann nefndi í því sambandi IKEA, en hann vonast til að fyrirtækið sé tilbúið til að styrkja IPU í framtíðinni, og þá sé líklegt að þeir vilji styrkja verkefni sem tengjast málefnum barna. Hann sagði nauðsynlegt að fulltrúar aðildarríkjanna leggist á eitt og hjálpi starfsfólki IPU við verkefnið, bendi á hugsanlega styrktaraðila og aðstoði við upplýsingaöflun. Þá vakti Þuríður athygli á nýju útliti á vefsvæði IPU og sagði það til mikilla bóta varðandi aðgengi og ímynd sambandsins. Vefsvæðið verður uppfært enn frekar á næstu mánuðum. Jafnframt var rætt var um skuldbindingar varðandi lífeyrisgreiðslur og laun en IPU er skuldbundið samningsbundnum launakjörum Sameinuðu þjóðanna. Örnfjäder lagði áherslu á að á meðan ekki væri til staðar betra launakerfi en það sem Sameinuðu þjóðirnar halda úti sé ekki skynsamlegt að gera breytingar. Nefndarmenn þökkðu Örnfjäder fyrir mikið og gott starf varðandi fjármál sambandsins og í framkvæmdastjórn og lögðu áherslu á að með niðurskurði fjármagns til IPU yrði sambandið að takmarka starfsemi sína við meginforgangsverkefni sem skilgreind eru í stefnmörkun sambandsins fyrir árin 2012-2017.

Þá var rætt um lausar stöður fyrir fulltrúa Tólflús-hópsins í embætti á vegum IPU og mun Katri Komi frá Finnlandi m.a. sækjast eftir endurkjöri í ráðgjafanefnd um málefni Sameinuðu þjóðanna. Þá skapaðist umræða um að staða Krister Örnfjäder sem einn af fjórum fulltrúum Tólflús-hópsins í framkvæmdastjórn IPU, væri laus á haustþingi 2013 og því mikilvægt að norrænu landsdeildirnar skoðuðu hvort þau hefðu fulltrúa sem hefði áhuga á að sækjast eftir því embætti. Tekin var ákvörðun um að ræða málið frekar í Québec og voru nefndarmenn sammála um mikilvægi þess að hafa norrænan fulltrúa í framkvæmdastjórn IPU.

Enn fremur var farið yfir helstu umræðuefni haustþingsins og skiptingu þingmanna í fastanefndir. Umræðuefni fastanefndanna eru m.a. hlutverk þjóðþinga við vernd almennings, sanngjörn viðskipti og nýbreytni við fjármögnun fyrir sjálfbæra þróun og hlutverk fjölmiðla, þ.m.t. samskiptavefja á internetinu, við að stuðla að þátttöku borgaranna og lýðræði. Jafnframt

fer fram sérstök umræða sem ber yfirskriftina „ríkisfang, kennimark, tungumál og menningarmismunur í hnattrænum heimi“. Nefnd um málefni Sameinuðu þjóðanna mun funda í tengslum við þingið auk þess sem haldin verður málstofa um jafnréttismál. Þá var rætt um hugsanlegar tillögur að neyðarályktun og þykir líklegt að tillaga um ástandið í Sýrlandi verði fyrir valinu.

Þuríður sagði nefndarmönnum frá ályktun sem samþykkt var á haustþingi IPU í Bern 16. - 19. október 2011 um mál Birgittu Jónsdóttur. Málið hefur verið til umfjöllunar hjá mannréttindanefnd IPU en nefndin hefur m.a. fjallað um málið út frá tjáningarfrelsi sem hornstein lýðræðis. Á þinginu í Québec mun nefndin fjalla enn frekar um málið. Þá bauð Þuríður Backman fyrir hönd Íslandsdeildar IPU norrænu landsdeildunum til norræns hádegisverðar mánudaginn 22. október kl. 13.00 í Québec. Jafnframt var rætt um framtíðarfyrirkomulag norrænu samráðsfundanna sem haldnir hafa verið tvisvar á ári, til skiptis í norrænu ríkjunum, til undirbúnings fyrir vor- og haustþing IPU. Voru nefndarmenn sammála um að núverandi fyrirkomulag væri ákjósanlegt, þar sem fundirnir væru haldnir í höfuðborgum viðkomandi formennskuríkis. Þá var jafnframt ákveðið að halda næsta norræna undirbúningsfund í Svíþjóð í mars 2013 til undirbúnings 128. vorþings IPU í Quito 21. - 27. mars 2013.

- Frekari upplýsingar og fundargögn fást hjá ritara nefndarinnar. -